



家範典第八十九卷

夫婦部紀事四

唐書高祖皇后竇氏傳后歸於帝工爲篇章規誠文有雅體又善書與高祖書相雜人不辨也崩于涿郡年四十五帝在煬帝時多畜善馬后見曰上性樂此盍以獻徒留之速非無益也不聽頃果坐譴帝後見隋政亂多妄誅殛乃爲自安計數奏鷹犬異駒煬帝果喜擢位將軍因泣謂諸子曰早用而母言得此久矣

太宗皇后長孫氏傳后嘗採古婦人事著女則十篇又爲論斥漢之馬后不能檢仰外家使與政事乃戒其車馬之侈此謂開本源恤末事常誠守者吾以自檢故書無條理勿令至尊見之及崩宮司以聞帝爲之慟示近臣曰后此書可用垂後我豈不通天命而割情乎顧內失吾良佐哀不可已已李白傳白晚好黃老度牛渚磯至姑孰悅謝家青山欲終焉及卒葬東麓元和末宣歙觀察使范傳正祭其冢禁樵採訪後裔惟二孫女嫁爲民妻進止仍有風範因泣曰先祖志在青山頃葬東麓非本意傳正爲改葬立二碑焉告二女將改妻士族辭以孤窮失身命也不願更嫁傳正嘉歎復其夫

徭役

柳公綽傳東都仁和里裴尙書寬子孫衆盛實爲名閥天后時宰相魏元忠選尙書之先爲壻未成婚而魏陷羅織獄家徙嶺表及北還女已踰笄其家議無以爲衣食資願下髮爲尼有一尼自外至曰女福厚豐必有令匹子孫將遍天下宜北歸家人遂不敢議及荆門則裴齋裝以迎矣今勢利之徒捨信誓如反掌則裴之蕃衍乃天之報施也

薛舉傳舉子仁杲性賊悍初舉每破陣軍獲俘仁杲必斷舌刈鼻或春斮之其妻亦凶暴喜鞭楚人見不勝痛宛轉於地者則埋其足露腹背受捶人畏而不親

李大亮傳大亮族孫迴秀字茂之母少賤妻常冒媵婢母聞不樂迴秀卽出其妻或問之答曰娶婦要欲事姑苟違顏色何可留

宇文士及傳士及從秦王平宋金剛錄功復隋舊封以宗室女妻之擢右衛大將軍太宗延入閣語或至夜分出遇休沐往往馳召士及益自謹其妻常問向遽召何所事士及卒不對

楊弘禮傳弘禮弟弘武自荊州司馬擢司戎少常伯帝嘗讓曰爾在戎司授官多非其才何邪弘武

曰臣妻剛悍此其所屬不敢違以諷帝用后言也帝笑不罪

竇懷貞傳懷貞字從一會歲除中宗夜宴近臣謂曰聞卿喪妻今欲繼室可乎懷貞唯唯俄而禁中寶扇障衛有衣翟衣出者已乃韋后乳媼王所謂宮國夫人者故蠻婢也懷貞納之不辭又避后先諱而以字稱世謂媼壻爲阿箬懷貞每謁見奏請輒自署皇后阿箬而人或謂爲國箬軒然不慙以自媚于后韋后敗斬妻獻其首貶濠州司馬

李珣傳珣字待價幼孤性寡欲早喪妻不置妾侍門無餽餉

顏杲卿傳安祿山反杲卿被殺徇首于衢莫敢收有張湊者得其髮持謁上皇是夕見夢帝寤爲祭後湊歸髮于其妻妻疑之髮若動云

高祖女平陽昭公主傳公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能偕奈何主曰公行矣我自爲計紹詭道走并州主奔鄆發家貲招南山亡命得數百人以應帝於是名賊何潘仁璧司竹園殺行人稱總管主遣家奴馬三寶喻降之共攻鄆別部賊李仲文向善志丘師利等各持所領會戲下因略地盤屋武功始平下之乃申法誓衆禁剽奪遠

近咸附勒兵七萬威振關中帝渡河紹以數百騎並南山來迎主引精兵萬人與秦王會渭北紹及主對置幕府分定京師號娘子軍

楚王靈龜妃上官傳上官下邳士族也靈龜卒將葬前妃無近族議者欲不舉妃曰逝者有知魂可無託乎乃備禮合葬聞者嘉歎喪除兄弟共諭妃少又無子可不有行泣曰丈夫以義婦人以節我未能殉溝壑尙可御粧澤祭他胙乎將自刎則眾遂不敢彊

樊彥琛妻魏傳魏揚州人彥琛病魏曰公病且篤不忍公獨死彥琛曰死生常道也幸養諸孤使成立相從而死非吾取也彥琛卒值徐敬業難陷兵中聞其知音令鼓箏魏曰夫亡不死而逼我管絃禍由我發引刀斬其指軍伍欲強妻之固拒不從乃刃擬頸曰從我者不死魏厲聲曰狗盜乃欲辱人速死吾志也乃見害聞者傷之

李德武妻裴傳裴字淑英安邑公矩之女以孝聞鄉黨德武在隋坐事徙嶺南時嫁方踰歲矩表離婚德武謂裴曰我方貶無還理君必儷他族于此長訣矣答曰夫天也可背乎願死無他欲割耳誓保姆持不許夫姻媚歲時朔望裴致禮惟謹居不御薰澤讀列女傳見述不更嫁者謂人曰不踐二

庭婦人之常何異而載之書後十年德武未還矩決嫁之斷髮不食矩知不能奪聽之德武更娶尔朱氏遇赦還中道聞其完節乃遣後妻爲夫婦如初

賈直言妻董傳直言坐事貶嶺南以妻少乃訣曰生死不可期吾去可亟嫁無須也董不答引繩束髮封以帛使直言署曰非君手不解直言貶二十年乃還署帛宛然及湯沐髮墮無餘

李湍妻某氏傳湍籍吳元濟軍元和中自拔歸烏重引妻爲賊縛而鬻食之將死猶號湍曰善事烏僕射觀者歎泣重引請以其事屬史官詔可

房元齡妻盧傳盧失其世元齡微時病且死訣曰吾病革君年少不可寡居善事後人盧泣入帷中剔一目示元齡明無他會元齡良愈禮之終身

劉君良傳隋大業末荒饑妻勸其異居因易置庭樹烏雛令鬪且鳴家人怪之妻曰天下亂禽鳥不相容況人邪君良卽與兄弟別處月餘密知其計因斥去妻曰爾破吾家召兄弟流涕以告更復同居

令狐恒傳恒貶吉州別駕稍遷刺史齊映爲江西觀察使按部及州恒輕映後出先至宰相今雖屬

刺史自挾所以過映者至迎謁頗怏怏以語其妻妻曰君自視何如人以白頭走小生前君不以此見映雖黜死我無憾映至恒入謁從容步進不祿首屬戎器映以爲恨去至府隨恒舉奏前刺史過失無狀不宜按部貶衢州別駕

薛仁貴傳仁貴絳州龍門人少貧賤以田爲業將改葬其先妻柳曰夫有高世之材要須過時乃發今天子自征遼東求猛將此難得之時君盍圖功名以自顯富貴還鄉葬未晚仁貴乃應募

李日知傳日知鄭州滎陽人先天元年爲刑部尙書屢乞骸骨許之將有請不謀于家歸乃治行妻驚曰產利空空何辭之遽日知曰仕至此已過吾分人亦何厭之有若厭于心無日而足也

崔元暉傳元暉子渙渙子縱縱子碣爲河南尹邑有大賈王可久轉貨江湖間值龐勛亂盡亡其貲不得歸妻詣卜者楊乾夫咨存亡乾夫名善數而內悅妻色且利其富旣占陽驚曰乃夫殆不還矣卽陰以百金謝媒者誘聘之妻乃嫁乾夫遂爲富人他年徐州平可久困甚丐衣食歸閭里往見妻乾夫大怒詬逐之妻詣吏自言乾夫厚納賄可久反得罪再訴復坐誣可久恨歎遂失明碣之來可久陳寃碣得其情卽敕吏掩乾夫并前獄史下獄悉發贓姦一日殺之以妻還可久時淫療獄決而

露都民相語歌舞于道

王維傳維字摩詰喪妻不娶孤居三十年

孟浩然傳崔顥有文無行娶妻惟美者俄又棄之凡四五娶

李益傳益故宰相揆族子少癡而忌克防閑妻妾過嚴世謂妒焉

高祖女丹陽公主傳公主下嫁薛萬徹萬徹蠱甚公主羞不與同席者數月太宗聞笑焉爲置酒悉

召它壻與萬徹從容語握槊賭所佩刀陽不勝遂解賜之主喜命同載以歸

太宗女新城公主傳公主下嫁長孫詮詮以罪徙嶺州更嫁韋正矩爲奉冕大夫遇主不以禮俄而

主暴薨高宗詔三司雜治正矩不能辯伏誅以皇后禮葬昭陵旁

肅宗女和政公主傳公主下嫁柳潭安祿山陷京師寧國公主方慶居主棄三子奪潭馬以載寧國
身與潭步日百里潭躬水薪主躬爨以奉寧國從元宗至蜀始封遷潭駙馬都尉郭千仞反潭率折
衝張義童等殊死鬪主穀弓授潭潭手斬賊五十級平之廣德時吐蕃再入寇主方嬖入語備邊計
潭固止主曰君獨無兄乎入見內殿翌日免乳而薨

襄陽公主傳公主始封晉康縣主下嫁張孝忠子克禮主縱恣常微行市里有薛樞薛渾李元本皆得私侍而渾尤愛至謁渾母如姑有司欲致詰多與金使不得發克禮以聞穆宗幽主禁中元本乃功臣惟簡子故貸死流象州樞渾崖州

高叡妻秦傳叡爲趙州刺史爲默啜所攻州陷叡仰藥不死至默啜所示以寶帶異袍曰降我賜爾官不降且死叡視秦秦曰君受天子恩當以死報賊一品官安足榮自是皆瞑目不語默啜知不可屈殺之

盧惟清妻徐傳徐淄州人世客陳留惟清仕歷校書郎徐女兄之夫李宜得以罪斥惟清坐僚姻貶播州尉徐還鄉里糲食斥鋸膏采絛不御會大赦徐間關迎惟清至荊州聞惟清死二髯奴將刼徐歸下江徐知之數其罪奴不敢逼刼其貲去徐偕道行至播川足繭流血得惟清尸以喪還闔歲至洛陽旣葬以無子終服還陳留汴州刺史齊澣高其節頌而詩之

楊烈婦傳楊李侃妻也建中末李希烈陷汴謀襲陳州侃爲項城令希烈分兵數千略定諸縣侃以城小賊銳欲遁去婦曰寇至當守力不足則死焉君而逃尙誰守侃曰兵少財乏若何婦曰縣不守

則地賊地也倉廩府庫皆其積也百姓皆其戰士也于國家何有請重賞募死士尚可濟侃乃召吏民入庭中曰令誠若主也然滿歲則去非如吏民生此土也墳墓存焉宜相與死守忍失身北面奉賊乎衆泣許諾乃徇曰以瓦石擊賊者賞千錢以刀矢殺賊者萬錢得數百人侃率以乘城婦身自爨以享衆報賊曰項城父老義不下賊得吾城不足爲威宜亟去徒失利無益也賊大笑侃中流矢還家婦責曰君不在人誰肯固死于外猶愈于牀也侃遽登城會賊將中矢死遂引去縣卒完詔遷侃太平令

段居貞妻謝傳謝字小娥洪州豫章人居貞本歷陽俠少年重氣決娶歲餘與謝父同賈江湖上並爲盜所殺小娥赴江流傷腦折足人救以免轉側丐食至上元夢父及夫告所殺主名離析其文爲十二言持問內外姻莫能曉隴西李公佐隱占得其意曰殺若父者必申蘭若夫必申春試以是求之小娥泣謝諸申乃名盜亡命者也小娥詭服爲男子與傭保雜物色歲餘得蘭于江州春于獨樹浦蘭與春從兄弟也小娥託傭蘭家日以謹信自効蘭寢倚之雖包苴無不委小娥見所盜段謝服用故在益知所夢不疑出入二期伺其便他日蘭盡集羣偷醺酒蘭與春醉臥廬小娥閉戶拔佩刀

斬蘭首大呼捕賊鄉人牆救禽春得贓千萬其黨數十小娥悉疏其人上之官皆抵死乃始自言狀
刺史張錫嘉其烈白觀察使使不爲請還豫章人爭聘之不許祝髮事浮屠道垢衣糲飯終身

劉悟傳悟子從諫嗣留後從諫妻裴封燕國夫人寬厚有謀每勸從諫入朝爲子孫計從諫有妾韋
願封夫人許之詔至裴怒毀詔不與從諫它日會裴黨復出詔裴抵去曰淄青李師古四世阻命不
聞側室封者君承朝廷姑息宜自黜削求洗濯欲以婢爲夫人族不日滅耳從諫赧然止

元宗皇后王氏傳后無子愛弛不自安承間泣曰陛下獨不念阿忠脫紫半臂易斗麪爲生日湯餅
邪帝憫然動容阿忠后呼其父仁皎云繇是久乃廢寶應元年追復后號

棣王琰傳琰始王郾後徙王棣會妃韋以過置別室而二孺人爭寵不平求巫者密置符琰履中以
求媚仇人告琰厭魅上帝伺其朝使人取履視之信帝怒責琰琰頓首謝曰罪臣宜死然臣與婦不
相見二年有二孺人爭長臣恐此三人爲之及推果驗然帝猶疑琰怒未置太子以下皆爲請乃囚
于鷹狗坊以憂薨妃緡之女無子還本宗

李希烈傳始希烈入汴聞戶曹參軍竇良女美彊娶之女顧曰慎無戚我能滅賊後有寵與賊祕謀

能轉移之嘗稱仙奇忠勇可用而妻不賣姓願如奴婢者以同其夫者烈許諾美聞在謂仙奇妻曰賊雖強終必敗云何寶久而寤及希烈死子不發喪欲悉誅諸將乃自立未決有獻含桃者寶請分遣仙奇妻聽之因蠟帛丸雜果中出所謀仙奇大驚與薛育率兵謀而入子出徧拜曰請去帝號如臨淄故事語已斬之函希烈并妻子七首獻天子

宣宗女廣德公主傳公主下嫁于琮初琮尙永福公主主與帝食怒折匕箸帝曰此可爲士人妻乎更許琮尙主琮爲黃巢所害主泣曰今日誼不獨存賊宜殺我巢不許乃縊室中主治家有禮法嘗從琮貶韶州侍者纔數人卻州縣餽遺凡內外冠婚喪祭主皆身答勞疏戚咸得其心爲世聞婦高宗廢后王氏傳后父仁祐母柳初蕭良娣有寵而武才人貞觀末以先帝宮人召爲昭儀昭儀與后良娣爭寵更相毀短而昭儀詭險卽誣后與母挾媚道壘上帝信之解魏國夫人門籍罷后舅柳爽中書令李義府等陰佐昭儀以偏言怒帝遂下詔廢后良娣皆爲庶人囚宮中后母兄良娣宗族悉流嶺南許敬宗又奏仁祐無他功以宮掖故超列三事今庶人謀亂宗社罪宜夷宗仁祐應斷棺陛下不窮其誅家止流竄仁祐不宜引庇廢宥逆子孫有詔盡奪仁祐官爵而后及良娣俄爲武后

所殺改后姓爲蟒良娣爲梟初帝念后間行至囚所見門禁錮嚴進飲食竇中惻然傷之呼曰皇后良娣無恙乎今安在二人同辭曰妾等以罪棄爲婢安得尊稱耶流淚嗚咽又曰陛下幸念疇日使妾死更生復見日月乞署此爲回心院帝曰朕卽有處置武后知之促詔杖二人百剐其手足反接投醢瘞中曰令二嫗骨醉數日死殊其屍初詔旨到后再拜曰陛下萬年昭儀承恩死吾分也至良娣罵曰武氏狐媚讎覆至此我後爲猫使武氏爲鼠吾當扼其喉以報后聞詔六宮母畜猫武后頻見二人披髮瀝血爲厲惡之以巫祝解謝卽徙蓬萊宮厲復見故多駐東都中宗卽位皆復其姓高宗則天順聖皇后武氏傳后并州文水人父士護文德皇后崩久之太宗聞士護女美召爲才人方十四母楊慟泣與訣后獨自如曰見天子庸知非福何兒女悲乎母避其意止泣旣見帝賜號武媚及帝崩與嬪御皆爲比丘尼高宗爲太子時入侍悅之王皇后久無子蕭淑妃方幸后陰不悅他日帝過佛廬才人見且泣帝感動后廉知狀引內後宮以撓妃寵才人有權數詭變不窮始下辭降體事后后喜數譽于帝故進爲昭儀一旦顧幸在蕭右寢與后不協后性簡重不曲事上下而母柳見內人尙宮無浮禮故昭儀伺后所薄必款結之得賜予盡以分遺由是后及妃所爲必得得輒以

聞然未有以中也昭儀生女后就顧弄去昭儀潛斃兒衾下伺帝至陽爲歡言發衾視兒死矣又驚問左右皆曰后適來昭儀卽悲涕帝不能察怒曰后殺吾女往與妃讒媚今又爾邪由是昭儀得入其眚后無以自解而帝愈信愛始有廢后意久之欲進號宸妃侍中韓瑗中書令來濟言妃嬪有數今別立號不可昭儀乃誣后與母厭勝帝挾前憾實其言將遂廢之長孫無忌褚遂良韓瑗及濟頻死固爭帝猶豫而中書舍人李義府衛尉卿許敬宗素險側狙勢卽表請昭儀爲后帝意決下詔廢后詔李勣于志寧奉璽綬進昭儀爲皇后命羣臣及四夷酋長朝后肅義門內外命婦入謁朝皇后自此始后見宗廟再贈士韞至司徒爵周國公諡忠孝配食高祖廟母楊再封代國夫人家食魏干戶后乃製外戚誠獻諸朝解釋譏諫于是逐無忌遂良踵死徙寵煥赫然后城寓深痛柔屈不恥以就大事帝謂能奉已故拔公議立之已得志卽盜威福施施無憚避帝亦懦昏舉能鉗勒使不得事久稍不平麟德初后召方士郭行真入禁中爲蠱祝宦人王伏勝發之帝怒因是召西臺侍郎上官儀儀指言后專恣失海內望不可承宗廟與帝意合乃趣使草詔廢之左右馳告后遽從帝自訴帝羞縮待之如初猶意其患且曰是皆上官儀教我后諷許敬宗搆儀殺之初元舅大臣怫旨不闕歲

屠覆道路目語及儀見誅則政歸房帷天子拱手矣羣臣朝四方奏章皆曰二聖每視朝殿中垂簾帝與后偶坐生殺賞罰惟所命當其忍斷雖甚愛不少隱也帝晚益病風不支天下事一付后蕭妃女義陽宣城公主幽掖庭幾四十不嫁太子弘言于帝后怒酖殺弘帝將下詔遜位于后宰相郝處俊固諫乃止后欲外示寬裕却人心使歸己卽奏言今羣臣納半俸百姓計口錢以瞻邊兵恐四方妄商虛實請一罷之詔可儀鳳三年羣臣蕃夷長朝后于光順門帝頭眩不能視侍醫張文仲秦鳴鶴曰風上逆砭血頭可愈后內幸帝殆得自專怒曰是可斬帝體寔刺血處邪醫頓首請命帝曰醫議疾烏可罪且吾眩不可堪聽爲醫一再刺帝曰吾目明矣言未畢后簾中再拜謝曰天賜我師身負繪寶以賜

丁公著傳公著字子平清約守道四十喪妻終身不畜妾

房瑄傳瑄子孺復幼頗能屬文然狂縱不法淮南節度使陳少游奏置幕府多招術家言已三十當得宰相以熏權近希進取後辟浙西韓滉府與妻鄭不相中慈姆爲言乃具棺召家人生斂之鄭方乳促上道鄭死于行又娶崔昭女崔悍媚殺二侍兒私瘞之觀察使以聞貶連州司馬聽崔去旣又

與崔通請復合詔許未幾復離終容州刺史

李元素傳元素字太朴妻石泉公王方慶之孫前妻子皆不肖而元素溺愛姬侍王不見答元素久疾益昏惑遂出之王訴諸朝詔免元素官且令畀王貲五百萬

令狐彰傳彰子建累官左神武軍大將軍其妻成德節度使李寶臣女也建將棄之誣與門下客郭士倫通榜殺士倫而逐其妻寶臣請劾按無狀會赦免

路敬淳傳敬淳弟敬潛坐事繫獄免死後爲遂安令先是令多死敬潛欲辭妻曰君不死獄而得令非生死有命邪從之到官久之遷衛令位中書舍人

李邕傳邕爲陳州刺史仇人告邕贓貸枉法貶遵化尉邕妻溫復爲邕請戍邊自贖曰邕少習文章疾惡如讎不容于衆邪佞切齒諸儒側目頻謫遠郡削跡朝端不啻十載歲時歎戀聞者傷懷屬國家有事泰山法駕旋路邕獻牛酒例蒙恩私妾聞正人用則佞人憂邕之禍端故自此始且邕比任外官卒無一毀天意暫顧罪過旋生諺曰士無賢不肖入朝見疾惟陛下明察邕初蒙訊責便繫牢戶水不入口者踰五日氣息奄奄惟更是聽事生吏口迫邕手書貸人蠶種以爲枉法市羅貢奉指

古今圖書集成
爲姦賊于時亟使明堂手捉巖固號天訴地誰肯爲聞泣血去國投骨荒裔永無還期妾願使豈得充一卒効力王事膏塗朔邊骨糞沙壤成豈夙心表入不省

楊含妻蕭傳蕭父歷爲撫州長史以官卒母亦亡蕭年十六與媚皆韶淑毀貌載二喪還鄉里貧不能給舟庸次宣州戰烏山舟子委樞去蕭結廬水濱與婢穿墳納棺成墳時松柏朝夕哭臨有馴烏縞兔菌芝之祥長老等爲立舍歲時進粟繖喪滿不釋縗人高其行或請昏女曰我弱不能北還君誠爲我致二柩葬故里請事君子于是含以高安尉罷歸聘之且請如素蕭以親未葬許其載辭其采已葬乃釋服歸楊云

韋雍妻蕭傳張弘靖鎮幽州也表雍在幕府朱克融亂雍被劫蕭聞難與雍皆出左右格之不退雍臨刃蕭呼曰我苟生無益願今日死君前刑者斷其臂乃殺雍蕭意象晏然觀者哀歎是夕死大和中楊志誠表其烈詔贈蘭陵縣君雍字和叔擢進士第

衡方厚妻程傳大和中方厚爲雍州錄事參軍招討使董昌齡治無狀方厚數爭事昌齡怒將執付吏辭以疾不免卽以死告臥棺中昌齡知之使闔棺甚牢方厚閉久以爪攫棺爪盡乃絕程懼并死